

Jaabwo ká Oholuhyyeh ho odeheh ole

Ole rih ojah jaabwo ká Oholuhyyeh ho odeheh ole. Oholuhyyeh ubwoomu ubwoomu kemh a juwa buh omu odada le. Uka oowa lê, ingingihye á juwa kpongkpongh ka. Owale, Oholuhyyeh a jih eneh jih eneh ko ho epu oveh bala odeheh ole lele.

Uka oowa le, odeheh ole da am la uhwoh la uhwoh. Ongongohe á jam odeheh ole ka. Iyoh ololohe á juwa ka inyinyi. Ochinu ololohe á juwa u-uhyyeh ogba uka oowa ka inyinyi. Iyoh-enyih ololohe á juwa e-epu nya enyih ka. Upu bala o-kojih ololohe á juwa ka inyinyi. Odeheh ole da am la uhwoh la uhwoh. Ukpowuh otuka otuka juwa e-eega mí ega nya odeheh ole uka oowa inyinyi.

Inyi le, Oholuhyyeh a yah ela yekee, ahigbooh, ahu nyí juwa odeheh me lele. Owale, ahigbooh a juwa odeheh inyi ilehi lele. Ahigbooh oowa a rih ahi opyepye le. Owale, ukpowuh a rih oduh ohiih lele. Ahigbooh a rih ang nya ogbanye ole ká Oholuhyyeh ho e-epu nya odeheh ole le. Uka oowa, Oholuhyyeh ayidang la ilomu ye jaabwo ká ahigbooh oowa ole ko ho hiigu lume uka oowa.

Inyi le, Oholuhyyeh a chi egbamü ebwoh ka uhyeh ogba hih ipi lele. Owale, egbamü a jih uhyeh le, ipi a juwa e-ekpelejih nyamu lele.

Owale, Oholuhyyeh a mimi yah ela yekee, enyih, ahu nyí chi ebwoh kaka rih ihuh ituka ká ipi nyí hih eveh me le. Owale, o ho inyi inyi ilehi lele. Enyih a chi ebwoh kaka rih ihuh ituka le, ipi a hih eveh lele. Uka oowa, Oholuhyyeh ye jaabwo ki hiigu lume inyinyi.

Uka oowa, Oholuhyah mimi yah ela yekee, anu, apu mí apu bala ekejih mí ekejih dateh dateh, anu nyí buh kpeheh buh epu nya ipi me, ká onyi mí onyi la epu nyanu nyí nwu egbeh la uma nya ilomu me lele. Iiwe, Oholuhyah a buh ho ame bala apu bala ekejih ituka bala ichicheh dateh dateh ile ki jam e-epu nya odeheh ole le. Oowa le, uma nya ame bala apu bala ekejih onyi mí onyi a juwa buh kpeheh onyeeweh inyinyiinyi lele. Uka oowa, Oholuhyah ye jaabwo ká ang wuuuh ile ko ho hiigh lume uka oowa inyinyi.

Uka oowa, Oholuhyah mimi yekee, ang o-huh ahigbooh ha la uka nya enu bala aloduh, anu nyí jih me. Owale, i juwa ilehi lele. Owale, Oholuhyah a ho le, enu a juwa chi la uka nya ahi opyepye le, oya a juwa hu la uka nya oduh ohiih lele. Enu rih ahigbooh otuka otuka, oya rih ahigbooh ochicheh. Enu bala oya anyi, i gaa kpa wa ahi opyepye bala oya bala eka lê. Owale, Oholuhyah a ho idichu wuuuh inyinyi lele. Oholuhyah yaa ki hiigh lume inyinyi uka oowa.

Inyi le, Oholuhyah a mimi yah ela yekee, anu iyoh-iyenyih, anu nyí juwa e-epu nya ihuh ituka iwe wuuuh me lele. Anu ang ile wuuuh kii nyi gaa da awa, anu nyí jih inyinyi me. Anu ichinu iluhyah ogba wuuuh, anu nyí jih kaanu nyí juwa huhu u-uhyah nya ohu me. Owale, ang iiwa wuuuh a juwa inyi ilehi lele. Oholuhyah a ho iyoh-iyenyih wuuuh bala ang ile ki gaa hihi e-epu nya enyih wuuuh lê. Oholuhyah a ho ichinu dateh dateh ile ki gaa juwa huhu u-uhyah nya ohu lê. Oholuhyah a ho ang ihihi ilepu nya

enyih bala ilepu nya uhyeh ohu wuuh jaabwo mí abwo ká uma nyaa wuuh la kaka ba le. Uma nyaa wuuh dateh hih awule. Owale, Oholuhyah a byaah wuuh yekee, anu ang ilepu nya enyih wuuh bala ang iluhyah ohu wuuh, anu nyí pye kaanu nyí ma anyi mí epu nya enyih me. Kaanu ichinu nyí pye mí epu nya odeheh ole wuuh me lele. Uka oowa, Oholuhyah ye jaabwo ká ang iwe wuuh ko ho hiiguh lume.

Uka oowa le, Oholuhyah a mimi yah ela lele. O yekee, anu anyi-iyoh dateh dateh, anu nyí jih me lele. Iyoh inyingiri wuuh bala iyoh ilepwa wuuh bala ang ile ki gaa wulowulo i-ipi wuuh nyí jih wuuh me. Owale, uma nyaa onyi mí onyi a juwa lele. I dateh hih awule wuuh, í la uma ookpokpoh ka. Oholuhyah yaa jaabwo kiiwa wuuh hiiguh lume uka oowa inyinyi.

Inyi le, la uka o-hih ekpe ekpe wuuh le, Oholuhyah a yekee, iwa nyí ho onginyi eheh la uma nya iliiwa me lele. Saji ká onginyi eheh, owa nyi ka rih olegbejuh nya iyoh-enyih ilepu nya ihuh ituka wuuh bala ichinu iluhyah ogba wuuh bala iyoh ilepwame wuuh me lele. Owale, Oholuhyah a ho onginyi eheh la uma nya ilomu inyi ilehi lele. Owale, Oholuhyah a ho oleng nya ogbanye bala onyang nya ogbanye le, o da ihu nya ohihi jwaah lele. Owale, Oholuhyah a byaah yekee, anu nyí pye ogu ogu e-epu nya odeheh ole me lele. O mimi byaah yekee, anu nyí ye me, owa nyi huh apu bala ekejih ile kii nyi gaa nwu egbeh wuuh hanu, kaanu nyi ka ryaah lele. Apu ilekpoh lekpoh iwe wuuh nyi rih ang oririh nyanu le. Iyoh ilepu ame nyi ka rih ang oririh nyanu inyinyi le.

Iiwe, Oholuhyyeh a buh ho ang mí ang ile ko ho wuuuh lê. Owale, Oholuhyyeh a ye jaabwo ká ang mí ang wuuuh ile ko ho hiiguh lume kaka kpoyeh uka oowa lele. E-epu nya enuturu irwo-nye, Oholuhyyeh a kpa ho epu oveh bala odeheh ole bala ang mí ang ile wuuuh ki juwa e-epu nyaaa wuuuh lê. Owale, Oholuhyyeh a mu inyo e-epu nya uturu oharwiiyeh lele. Inyi le, Oholuhyyeh a mu inyo e-epu nya uturu oharwiiyeh lele. Inyi le, Oholuhyyeh a chi igogo juh enuturu oharwiiyeh lele.

Ejih omilamila nya onginyi eheh

Ole rih ojah jaabwo ká Oholuhyyeh buh ho oleng nya ogbanye bala onyang nya ogbanye. Uka ole ká Oholuhyyeh ho odeheh ole kpá bala ang ile wuuuh ki juwa e-epu nyamu le, owale, o kpa opi ho onginyi eheh lele. Owale, o huh ihu odada olokwinyih juh onginyi eheh oowa lele. Inyi le, onginyi eheh a la ohihi lele. Enyi nya oleng oowa a rih Adam lê. Owale, Oholuhyyeh a ba ikuh ha Adam le, Oholuhyyeh a juh ekejih dateh dateh lume lume u-uwa hoo lele. Ekejih ilepu nya ikuh oowa há uhi e-ehi lume. I hiiguh nya oririh lume inyinyi. Enyi nya ikuh oowa rih Ikuh nya Iden le. Ekejih imiiyeh ihye ki dateh hih iki-la wuuuh juwa e-epwariri nya ikuh oowa. Enyi nya ohe nya rih okojih nya ohihi. Enyi nya okila nya rih okojih nya o-jé ang onyobih dateh hih ang onyiila.

Uka oowa le, Oholuhyyeh a kpa Adam kaka ku u-uwa e-epu nya ikuh owe ká Adam ka kpehi riroo lele. Inyi le, Oholuhyyeh a yekee, nyí chila ká oleng ole nyi ka da am ubwoomu ubwoomu ka. Lé,

owa Oholuhyeh, owa nyi ka ho onginyi ongo-okila kii nyi ka da oleng ole ubwo lele. Inyi le, Oholuhyeh a ho le, Adam a juwa no uneh otuka otuka hururuuru lele. Owale, uka ká Adam juwa kpa uneh oowa no lè, Oholuhyeh a keleh kaka gba ukpunoguh olaka ohe nya Adam lele. Uka oowa le, Oholuhyeh a kpa ukpunoguh olaka nya Adam ole ká Oholuhyeh gba we, kpa ho onyang le, o hwooh ha Adam lele. Owale, Adam a wuru enyi nya onyang oowa yekee, Ibw lele. Inyi le, Adam a yekee, ukpinoguh ukpunoguh nya ilowa bala ahwiyoh nya ilowa nyaà lee rih Ibw lele. Inyi a duh ká oleng onyi mí onyi gaa tu ubwo hih adamu bala inamu uka ko juwa ka keleh kaka yeh ahu nyamu lè. Owale, oleng oowa bala ahu nyamu a la lala ongo-ookpokpoh kemh lele.

Inyi le, uka oowa le, oheh onyobih a ye kaka rih iloh lele. Saji iloh a la ijeehi gu anyi-iyoh ile ká Oholuhyeh hoho kpá wuuuh lele. Inyi le, enuturu ookpokpoh ohe le, iloh owe a bih onyang owe ki wuru Ibw yekee, Ibw eeh, mi ká Oholuhyeh nyi yekee, ahu nyí rihugbeh nya okojih ohe la ohe e-epu nya ikuh ole kpongkpongh ka? Owale, Ibw a we bih iloh oowa yekee, Oholuhyeh nyi mi onu ha iwa kiiwa nyi ka rih egbeh nya ekejih mí ekejih ilepu nya ikuh ole kaka hih okojih ole kii nyi riri we e-epwariri nya ikuh ole. Saji Oholuhyeh nyi yekee, iwa nyí rih ugbeh nya okojih oowa ka. Iwa nyí danu ya ubwo nyiwa gwooh kpongkpongh ka. Nyí rih kiiwa nyí ya ubwo nyiwa gwooh le, aale, iwa nyaà ka gbuh lele. Owale, iloh oowa a we bih onyang owe yekee, ahu nyí juwa gbuh i-ilehi ohe ka. Saji Oholuhyeh ayidang nyi jé yekee, nyí rih kaahu nyí rih ugbeh nya okojih owe le, aale, ahu nyaà ka jé ela lala

oheh oheh ayidang lele. Owale, ahu nyaà ka jé ang o-ta ipyo dateh hih ang onyiila inyinyi lele. Inyi nyaà duh ká Oholuhyeñ nyi yah inyi lê.

Owale, onyi onyang owe a juwa muru ye okojih oowa ching gbeeh lele. Owale, o ye jaabwo ká okojih oowa hiiguh lume e-ehi. O ye jaabwo ká ugbeh nyamu hiiguh nya oririh inyinyi lele. O meh iryah jaabwo ká ugbeh nya okojih oowa oririh ka ho ko ka je ela inyi ilehi inyinyi lele. Inyi le, onyang owe a huh ugbeh nya okojih owe rih lele. Owale, o huh ugbeh

nyamu ha orumu rih inyinyi lele. Inyi le, ahyaahi le, Adam bala Ibw a jé yekee, ang ole kiiwa nyi ho wee le, nyi rih ang o-ta ipyo lele. Uka owale, Adam bála Ibw a jé yekee, iwa nyi juwa lohi lohi inyinyi le, owale, i keleh ka mu apu nya okojih ohe ki wuru fig jú ogori lele.

Uka ko no pu uka nya enu obih le, Adam bala Ibw ahu nyamu a woh any nya Oholuhyah ko juwa wari we epu nya ikuh oowa lele. Uka oowa le, i juwa juh uhih nya Oholuhyah lê, i ru kaka kpu ibaa e-ekpe nya ekejih u-uwa e-epu nya ikuh lele. Inyi le, Oholuhyah a ben eko wuru Adam yekee, Adam, Adam, aleh ahu nyaa tí jih? Owale, Adam a we byooh yekee, owa nyi juh uhih nyang saji nya ole koowa nyi jih lohi lohi. Owale, owa nyaà ru kaka kpu ibaa hingh ahu Oholuhyah lê. Owale, Oholuhyah a bih Adam yekee, ahu nyi hya ugbeh nya okojih ole koowa nyi dang ehileh yekee, ahu nyí hyoo rih ka, rih le, leeh? Inyi le, Adam a we bih Oholuhyah yekee, nyi meh onyang ole ká ahu nyi huh ha owa, nyaà ti hya ugbeh nya okojih oowa ohe ha owa rih wee. Inyi le, Oholuhyah a bih Ibw yekee, ela olanyi, ahu nyaà tí ho inyi? Owale, Ibw a we bih Oholuhyah yekee, nyi meh iloh nyaà tí piri owa juh nyaà tí duduh koowa nyi hya ugbeh nya okojih oowa rih inyi we! Inyi le, Oholuhyah a yah ela to iloh bala Ibw bala Adam lele.

Inyi le, Oholuhyah a bih iloh yekee, owa nyi ka ga olo jungh saji nya ang ole kaahu nyi ho e-ega nya Ibw le. Ahu iloh, ahu nyaà ka rih onginyi nya inyiro-ibih gu anyi-iyoh ikila wuuuh lele. Oholuhyah mimi bih iloh yekee, egbapu nyang, ahu nyaà ka kpa je ediye piyoo

la ohihi nyang wuuh lele. Ekuruwah olipi nyaà ti rih ang oririh nyang piyoo inyinyi lele. Ahu iloh owe bala Ibw, anu nyi ka rih alujih nya awule buh ale ole keleh ka ilahi le. Anyi nyang ahu iloh bala anyi nya Ibw wuuh nyi ka rih alujih nya awule piyoo inyinyi le. Uka nyi juwa wari ká onyi nya Ibw ohe nyi ka beh egbejuh nyang ahu iloh owe eneh. Ahu iloh ayidang, ahu nyi ti ka chi onyi nya Ibw oowa angiri i-ichete nyamu inyinyi uka oowa. Iwe, Oholuhyeh a buh yah jeh Adam bala Ibw jaabwo ká oheh onyobih ka kpa akama waa bala jaabwo ká onyi nya Adam ohe ka kuru oheh onyobih la uka o-hih ekpe lele.

Inyi le, Oholuhyeh a yah ela ta Ibw byooh yekee, ahu nyi ka ye akama otuka otuka uka kaahu nyi ka ma onyi. Ahu nyi ka jih ekpelejih nya Adam oru nyang piyoo inyinyi le.

Inyi le, Oholuhyeh a yah ela ta Adam byooh yekee, Adam ahu nyí woh me, ahu nyi ka ho ukurwo gbeeh kaahu nyi ka buh inwuh e-engiri eneh kaahu nyi ka yéh ang oririh rih le. Owa Oholuhyeh nyi ka ho ká ejwoh bala ame bala apu nyi mi e-epu nya eru nyang ahu Adam le. Uka kaahu nyi ho ang la ongiri ongiri e-epwame kpá le, ahu nyaà ka yeh ang oririh rih lele. Opi ole kii nyi kpa hong, owa, ahu nyaà ka tiri ekpe ru ka, uka kaahu nyi ka gbuh lele. Oholuhyeh mimi byooh yekee, ang iwe wuuh nyi ka la inyi e-ega nyang. Saji nya ole kaahu Adam nyi mi keh uru la ela nya ahu nyang Ibw duh kaahu nyi hya ugbeh nya okojih ole koowa Oholuhyeh nyi dang ehileh yekee, ahu nyí hyoo rih kpongkpongka, rih. Lé, akama iwe, ahu nyaà ka ye lele. Uka ká Oholuhyeh yah ela taa iwa wuuh kpá iwe